

Mai 2018



GIG
CYMRU
NHS
WALES

**Addysg a Gwella Iechyd
Cymru (AaGIC)**
**Health Education and
Improvement Wales (HEIW)**

Diweddariad misol yw hwn i bartneriaid a rhanddeiliaid ar ddatblygiad Addysg a Gwella Iechyd Cymru (AaGIC) gan ei Brif Weithredwr, Alex Howells.

Bydd y sefydliad newydd, a fydd yn awdurdod iechyd arbennig a'r unfed aelod ar ddeg o deulu GIG Cymru, yn cael ei sefydlu'n ffurfiol ar 1 Hydref 2018.

Digwyddiadau i Randeiliaid

Diolch i bawb a fynychodd y digwyddiad i randdeiliaid yn Stadiwm Liberty, Abertawe ddydd Iau, 10 Mai - rydym yn gwerthfawrogi hyn yn fawr yn enwedig gan fod pawb mor brysur.

Roedd yn wych clywed yn uniongyrchol gan Steve Moore (Prif Weithredwr Bwrdd Iechyd Prifysgol Hywel Dda), a roddodd gyflwyniad ar ddatblygiadau a heriau'n ymwneud â'r gweithlu yn ne-orllewin Cymru, gan nodi'r cyfleoedd posibl i AaGIC o'i safbwynt ef.

Yn ogystal, myfyriodd Jo Oak (Cyfarwyddwr Cyllid Gofal Cymdeithasol Cymru) ar y broses o sefydlu Gofal Cymdeithasol Cymru fel corff newydd y llynedd, a dysgwyd llawer o bwyntiau defnyddiol.

Ffocws y digwyddiad oedd trafod y math o fodel ymgysylltu â rhanddeiliaid y dylem fod yn ceisio ei sefydlu ar gyfer y corff newydd, gyda'r nod o roi hyn ar waith mewn pryd ar gyfer "mynd yn fyw" ym mis Hydref.

Byddwn yn cynnal digwyddiad yn Llanelwy yng ngogledd Cymru ddydd Mawrth, 19 Mehefin, a byddwn yn trefnu digwyddiad yng nghanolbarth Cymru ddiwedd yr haf.

Cynhelir y digwyddiad lansio ffurfiol ar gyfer AaGIC yn Stadiwm Dinas Caerdydd ddydd Llun, 24 Medi.

I gofrestru ar gyfer unrhyw un o'r digwyddiadau hyn, e-bostiwch heiw@gov.wales. Diolch am eich cefnogaeth.

Penodiadau Newydd

Rydym wedi hysbysebu'n ddiweddar ar gyfer y tair rôl Cyfarwyddwr Gweithredol (Cyfarwyddwr Meddygol, Cyfarwyddwr Nyrsio, Cyfarwyddwr Cyllid a Gwasanaethau Corfforaethol), a bydd y prosesau asesu yn cael eu cynnal ddechrau mis Mehefin.

Rydym hefyd yn gobeithio penodi Ysgrifennydd y Bwrdd a Phennaeth Pobl dros yr wythnosau nesaf.

Yn fewnol, rydym yn ymgynghori ar strwythurau sefydliadol, a byddwn wedi cwblhau hynny erbyn canol mis Mehefin, fel bod gan bob aelod o staff ddealltwriaeth glir o'i le o fewn y sefydliad newydd.

Ar ôl hyn, gallwn ganolbwyntio ar sicrhau bod y staff yn teimlo eu bod yn cael cefnogaeth ac yn cael eu paratoi ar gyfer y cyfnod pontio.

Swyddogaethau AaGIC

Soniwyd am hyn yn y bwletin blaenorol, ond rydym yn dal i gael adborth am yr angen i barhau i bwysleisio rôl a chylch gorchwyl y sefydliad newydd yn ein gohebiaeth - yn enwedig gan nad yw'n bodoli'n swyddogol eto!

Felly dyma restr i'ch atgoffa o'r gwaith y byddwn yn ei wneud:

- Nodwyd y sail resymegol dros greu ein sefydliad newydd mewn dau adolygiad annibynnol, a oedd yn amlinellu'r angen am welliannau i'r trefniadau sefydliadol presennol ar gyfer cynllunio'r gweithlu, datblygu'r gweithlu, ac addysg a hyfforddiant o fewn y GIG.
- Byddwn yn gorff GIG ar wahân - Awdurdod Iechyd Arbennig, a fydd yn cael ei oruchwylio gan Fwrdd.
- Byddwn yn ymgorffori tri sefydliad sy'n bodoli eisoes: Deoniaeth Cymru, Canolfan Addysg Broffesiynol Fferylliaeth Cymru, a Gwasanaethau Gweithlu, Addysg a Datblygu GIG Cymru (GGAD). Bydd yr holl staff sy'n gweithio yn y sefydliadau hyn ar hyn o bryd yn trosglwyddo i'r Awdurdod Iechyd Arbennig newydd.
- Bydd ein swyddogaethau'n adeiladu ar rai sy'n bodoli eisoes, ond byddant hefyd yn ymgorffori rhai swyddogaethau newydd. Mae'r rhain yn cynnwys: cynllunio'r gweithlu; cudd-wybodaeth y gweithlu; comisiynu a darparu addysg; rheoli ansawdd addysg a hyfforddiant; cefnogi rheoleiddio; moderneiddio a datblygu'r gweithlu; gyrfaoedd ac ehangu mynediad; a datblygu arweinyddiaeth a chynllunio olyniaeth. Bydd gwella yn llinyn a fydd yn cysylltu'r holl swyddogaethau, gyda'r nod yn y pen draw o gyfrannu at wella'r system ehangach.
- Rydym yn "mynd yn fyw" ddydd Llun, 1 Hydref fel yr unfed corff ar ddeg o fewn GIG Cymru.

Er mai dim ond corff cysgodol ydym ar hyn o bryd, byddai'n ddefnyddiol iawn pe gallech ledaenu'r negeseuon allweddol hyn i gynifer â phosibl o'ch staff a'ch cydweithwyr.

Cysylltwch â ni os hoffech drefnu cyfarfod (neu i drafod AaGIC yn gyffredinol) drwy anfon e-bost at alex.howells@wales.nhs.uk.

Diolch am eich cefnogaeth barhaus,

Alex Howells

Prif Weithredwr Addysg a Gwella Iechyd Cymru (AaGIC)



Cymraeg



English



Cymraeg



English

[Hawlfraint y Llywodraeth Cymru / GIG Cymru](#)